



# The Holy See

---

BENEDICTVS XVI

*EPISTULA DATA*

*MARCO S.R.E. CARDINALI OUELLET, P.S.S.*

*ARCHIEPISCOPO METROPOLITAE QUEBENCENSI*

*NOMINATO MISSE EXTRAORDINARIO*

*AD BAPTISMI QUARTAE CENTENARIAE MEMORIAE*

*MAGNI CAPITIS MI'KMAQ NATIONIS MEMBERTOU CELEBRATIONEM*

*Venerabili Fratri Nostro*

*MARCO S.R.E. Cardinali OUELLET, P.S.S.*

*Archiepiscopo Metropolitae Quebencensi*

Quarta iam appetit saecularia memoria ex quo tempore sacro Baptismate est ablutum Magnum Caput Mi'kmaq Nationis Membertou atque Domini salutaria beneficia gentibus illis latius subministrari coepta sunt, sollertibus operantibus Evangelii praeconibus.

Admodum ideo decet et convenit ut eventus hic congruenter commemoretur et optimo iure extollatur. Celebratio enim haec copiam dat et facultatem rursus inter indigenas et reliquos Canadienses cives conciliandi animos, ut firma fide roborati certioribusque propositis suffulti una simul expedite in via salutis procedant.

Miserenti igitur favente Domino, evenientibus Kalendis Augustis in loco Chapel Island sollemnis erit ab illius Baptismi quarta centenaria commemoratio agenda, concurrentibus quoque fidelibus circumcirca commorantibus, ut Ecclesiae ista particula, inde fere sumens vim, vel uberiores fructus fundat et laetiores spiritalis commoditates in dies experiatur.

Quocirca Mi'kmaq gentis primorum Kji Saqmaw Sante' Mawiomi Ben Sylliboy et Kji Keptin Sante' Mawiomi Andrew S. Denny, Novae Scotiae Primi Ministri Rodney Mac Donald postulationibus subvenientes, ut ritus hic magnificentius efficaciusque evolvatur, mittere aliquem eminentem

Praesulem statuimus, qui partes Nostras sustineat et Personam agat. Ad te autem, Venerabilis Frater Noster, cogitationem convertimus, qui, Canadensis Nationis inclitus filius, prorsus idoneus occurris ad ministerium hoc praestandum et luculenter explendum. Itaque permagna moti affectione, te, Venerabilis Frater Noster, Missum extraordinarium Nostrum renuntiamus et constituimus ad celebrationem quam supra diximus agendam.

Universis igitur participibus fidelibusque inibi cunctis mentem Nostram benignam ostendes, ut maiorum probandas consuetudines sectantes, firmissime teneant fidei pietatisque cursum. Omnibus Nostro nomine Benedictionem Apostolicam impertias volumus, quae sit animorum renovationis signum et futuro de tempore supernarum nuntiatrix gratiarum.

*Ex Aedibus Vaticanis, die XXX mensis Iunii, anno MMX, Pontificatus Nostri sexto.*

## **BENEDICTUS PP. XVI**

© Copyright 2010 - Libreria Editrice Vaticana

---

Copyright © Dicastero per la Comunicazione - Libreria Editrice Vaticana